



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

26.02.2021թ.

Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ
թիվ ՍՅ-ԼՕ-2021/22

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Լ. Անանիկյանի

Պատվիրատու՝ «Մոնթե Մելքոնյանի անվան ռազմամարզական վարժարան»
հիմնադրամ

Մասնակից՝ «Արման Սվազյան» Ա/Ձ

Մասնակցությամբ՝

«Արման Սվազյան» Ա/Ձ-ի ներկայացուցիչ՝ Հ. Ենգոյանի,

Գնման ընթացակարգի ծածկագիրը և առարկան՝

«ՄՄԱՌՎ-ԲՄԾՁԲ-21/1» ծածկագրով բաց մրցույթ, սննդի պատրաստման
ծառայությունների ձեռքբերում

ՀՀ գնումների հետ կապված բողոքներ քննող անձը (այսուհետ նաև՝ Բողոքներ
քննող անձ)՝ ուսումնասիրելով Հայաստանի Հանրապետության ֆինանսների
նախարարության կողմից 27.01.2021թ.-ի թիվ 26/26/1042-2021 գրությամբ «Արման
Սվազյան» Ա/Ձ-ին (այսուհետ նաև՝ Մասնակից) գնումների գործընթացին մասնակցելու
իրավունք չունեցող մասնակիցների ցուցակում ներառելու նպատակով նախաձեռնված
ընթացակարգով ներկայացված հիմքերը,

Պ Ա Ր Ձ Ե Ց

1. Գործի նախապատմությունը.

ՀՀ Ֆինանսների նախարարությունը, «Մոնթե Մելքոնյանի անվան ռազմամարզական վարժարան» հիմնադրամի 18.01.2021թ. թիվ 645/1 գրության հիման վրա, 27.01.2021թ.-ին «Արման Սվազյան» Ա/Ձ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձի գործը մակագրվել է 27.01.2021թ.-ին:

29.01.2021թ.-ին www.gnumner.am կայքում հրապարակված հայտարարությամբ գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ընդունվել է վարույթ և տրվել է թիվ ՍՑ-ԼՕ-2021/22 համարի ծածկագիրը:

04.02.2021թ.-ին, 11.02.2021թ.-ին և 26.02.2021թ.-ին նշանակվել և հրավիրվել են նիստեր:

Գործի քննությունն ավարտվել է 11.02.2021թ.-ին և Բողոքներ քննող անձի որոշման հրապարակման օր է նշանակվել 26.02.2021թ.-ին:

2. «Մոնթե Մելքոնյանի անվան ռազմամարզական վարժարան» հիմնադրամի ներկայացրած փաստերը և դիրքորոշումը.

«Մոնթե Մելքոնյանի անվան ռազմամարզական վարժարան» հիմնադրամը 18.01.2021թ. թիվ 645/1 գրությամբ դիմել է ՀՀ Ֆինանսների նախարարությանը՝ հայտնելով հետևյալը.

«Հայտնում եմ Ձեզ, որ «Մոնթե Մելքոնյանի անվան ռազմամարզական վարժարան» հիմնադրամի կարիքների համար անհրաժեշտ Սննդի պատրաստման ծառայությունների ձեռքբերման համար կազմակերպված ՄՄԱՌՎ-ԲՄԾՁԲ-21/1 ծածկագրով գնումների էլեկտրոնային համակարգի (ARMEPS) միջոցով կազմակերպված բաց մրցույթի ընտրված մասնակից՝ «Արման Սվազյան» Ա/Ձ-ն հրաժարվել է պայմանագիրը կնքելուց: Գնահատող հանձնաժողովը հիմք ընդունելով «Գնումների մասին» ՀՀ օրենքի 6-րդ հոդվածի 1-ին կետի

6-րդ մասի բ. Պարբերությունը՝ «որպես ընտրված մասնակից հրաժարվել է պայմանագիր կնքելուց», որոշեց մերժել «Արման Սվազյան» Ա/Ձ-ի կողմից ներկայացված հայտը: Քանի որ ի հայտ են եկել Օրենքի 6-րդ հոդվածի 1-ին մասի 6-րդ կետով նախատեսված հիմքերը, ուստի Ձեզ ենք ներկայացնում «Արման Սվազյան» Ա/Ձ-ի տվյալները և ՄՄԱՌՎ-ԲՄԾՁԲ-21/1 ծածկագրով գնման ընթացակարգի արձանագրությունները:»:

Պատվիրատուն 12.02.2021թ.-ի թիվ 659/1 գրությամբ հայտնել է հետևյալը.

«Արման Սվազյան» Ա/Ձ-ին գնումների գործընթացներին մասնակցելու իրավունք չունեցող մասնակիցների ցուցակում ներառելու նպատակով նախաձեռնված թիվ ՍՑ-ԱՕ-2021/22 ընթացակարգի վերաբերյալ, հայտնում եմ, որ «Մոնթե Մելքոնյանի անվան ռազմամարզական վարժարան» հիմանդրամի /այսուհետև՝ պատվիրատու/ կարիքների համար սննդի ծառայությունների մատուցման ձեռք բերման նպատակով կազմակերպած ՄՄԱՌՎ-ԲՄԾՁԲ-21/1 ծածկագրով գնման ընթացակարգին մասնակցել է նաև «Արման Սվազյան» Ա/Ձ-ն: 08.12.2020թ.-ին վերջինս գնահատող հանձնաժողովի որոշմամբ ճանաչվել է ընտրված մասնակից: Գնումների մասին ՀՀ օրենսդրությամբ սահմանված ժամկետում «Արման Սվազյան» Ա/Ձ-ին է ներկայացվել պայմանագիր կնքելու առաջարկ և պրամադրվել է պայմանագրի համապատասխան նախագիծ:

Համաձայն ՀՀ գնումների մասին օրենսդրության պահանջների՝ «Արման Սվազյան» Ա/Ձ-ն, ներառյալ 08.01.2021 թվականի ժամը 18.00-ն պետք է որակավորման ապահովումները և իր կողմից հաստատված պայմանագրի 2 օրինակը գրությամբ ներկայացնեք պատվիրատուին, սակայն նշված ժամկետում «Արման Սվազյան» Ա/Ձ-ի կողմից ոչինչ չի ներկայացվել:

11.01.2021 թվականին հրավիրվել է գնահատող հանձնաժողովի նիստ և որոշում է կայացվել մերժել «Արման Սվազյան» Ա/Ձ-ին և ընտրված մասնակից ճանաչել հաջորդ տեղը զբաղեցրած մասնակցին:

12.01.2021 թվականին Դիլիջան քաղաքի «Հայփոստ» ՓԲԸ-ի բաժանմունքից տեղեկացրել են, որ «Արման Սվազյան» Ա/Ձ-ից պատվիրատուին հասցեագրված առաքանի կա: Ուսումնասիրելով ներկայացված ծրարում առկա փաստաթղթերը՝ պարզվել է, որ «Արման Սվազյան» Ա/Ձ-ի կողմից պայմանագիր կնքելու ծանուցման գրությամբ նախատեսված փաստաթղթերը ներկայացված են ոչ ամբողջական /անհրաժեշտության դեպքում կարող ենք ներկայացնել բացակայող փաստաթղթերի ցանկը/: Այդ իսկ պատճառով հանձնաժողովի արտահերթ նիստ չի հրավիրվել և «Արման Սվազյան» Ա/Ձ-ին մերժելու որոշումը չի փոփոխվել:

Ի լրումն վերոնշյալ գրության, Պատվիրատուն 23.02.2021թ.-ի թիվ 661/1 գրությամբ հայտնել է նաև հետևյալը.

«Ի լրումն փետրվարի 16-ին ՀՀ գնումների հետ կապված բողոքներ քննող անձին ներկայացված դիրքորոշման, ներկայացնում եմ «Արման Սվազյան» Ա/Ձ-ի կողմից՝ 12.01.2021 թվականին ստացված ծրարում առկա փաստաթղթերը և բացակայող փաստաթղթերի ցանկը:

12.01.2021 թվականին «Արման Սվազյան» Ա/Ձ-ի կողմից ստացված ծրարում առկա չեն եղել հետևյալ փաստաթղթերը՝

1. ՄՄԱՌՎ-ԲՄԾՁԲ-21/1 ծածկագրով պայմանագրի նախագծի ընդհանուր գումարի 10%-ի չափով տրուժանքի ձևով պայմանագրի կատարման ապահովումը,

2. ՄՄԱՌՎ-ԲՄԾՁԲ-21/1 ծածկագրով պայմանագրի նախագծի ընդհանուր գումարի 100%-ի չափով տրուժանքի ձևով որակավորման ապահովումը,

3. Հաստատված պայմանագրի նախագծի ներկայացման գրությունը:

12.01.2021 թվականին ստացված ծրարում առկա է եղել միայն հաստատված պայմանագրի նախագիծը (կից Ներկայացվում է բնօրինակից արտատպված փարբերակը):»:

3. «Արման Սվազյան» Ա/Ձ-ի ներկայացրած փաստարկները և դիրքորոշումը.

Բողոքներ քննող անձը 29.01.2021թ.-ին գրությամբ դիմել է «Արման Սվազյան» Ա/Ձ-ին՝ հնարավորություն տալով ՀՀ ֆինանսների նախարարության կողմից 27.01.2021թ.-ի թիվ 26/26/1042-2021 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը, ստանալով կարծիք հայտնելու վերաբերյալ գրությունը, ինչպես նաև ծանուցված լինելով հրավիրված նիստերի տեղի, օրվա և ժամի մասին, ներկայացել է հրավիրված նիստերին:

Ներկայացնելով գրավոր դիրքորոշում Մասնակիցը հայտնել է հետևյալը.

««Արման Սվազյան» Ա/Ձ-ն մասնակցության հայտ է ներկայացրել «Մոնթե Մելքոնյան անվան ռազմամարզական վարժարան հիմնադրամ»-ի կարիքների համար հայտարարված «ՄՄԱՌՎ-ԲՄԾՁԲ-21/1» ծածկագրով բաց մրցույթին /այսուհետ նաև՝ Ընթացակարգ/:

Ընթացակարգի գնահատող հանձնաժողովի 08.12.2020թ. տեղի ունեցած նիստի թիվ 4 արձանագրության՝ Արման Սվազյան Ա/Ձ-ն ճանաչվել է ընտրված մասնակից և նույն

արձանագրությամբ որոշել՝ անգործության ժամկետի ավարտից հետո ընտրված մասնակիցներին պայմանագիր կնքելու առաջարկ ներկայացնել:

Արման Սվազյան Ա/Ձ-ին պայմանագիր կնքելու մասին ծանուցումը և պայմանագրի նախագիծը ուղարկվել է 17.12.2020թ., համապատասխանաբար վերջնաժամկետ է սահմանվել 08.01.2021թ. ներառյալ (արտարտույունը կցվում է):

Արման Սվազյան Ա/Ձ-ն 08.01.2021թ.՝ փոստային առաքման միջոցով, ստորագրած պայմանագիրը սահմանված կարգով ներկայացրել է պատվիրատուին /համապատասխան ապացույցը կցվում է/:

Մինչդեռ, Ընթացակարգի գնահատող հանձնաժողովի կողմից՝ ՀՀ ֆինանսների նախարարությանը ուղղված գրություն համաձայն՝ Արման Սվազյան Ա/Ձ-ի հայտը մերժվել է, քանի որ վերջինս հրաժարվել է պայմանագիր կնքելուց /ըստ ՀՀ ֆինանսների նախարարությանը ուղղված գրության/:

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 6-րդ կետի «ա» ենթակետը սահմանում է, որ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը:

բ. որպես ընտրված մասնակից հրաժարվել է պայմանագիր կնքելուց:

Օրենքի 36-րդ հոդվածի 3-րդ մասը սահմանում է, որ եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին ներկայացնում պայմանագրի ապահովումը, ապա նա զրկվում է պայմանագիրն ստորագրելու իրավունքից:

ՀՀ կառավարության 04.05.2017թ. թիվ 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 32-րդ կետի 14-րդ ենթակետի համաձայն՝ ընտրված մասնակցի կողմից հաստատված պայմանագրի նախագիծը պատվիրատուին ներկայացվում է գրավոր, և դա ներկայացնելու գրությունը հաշվառվում է պատվիրատուի փաստաթղթաշրջանառության համակարգում: Պատվիրատուի ղեկավարի կողմից պայմանագրի նախագիծը հաստատվում է այդ իրավասության առաջացմանը հաջորդող երկու աշխատանքային օրվա ընթացքում:

«Նորմատիվ իրավական ակտերի մասին» ՀՀ օրենքի 32-րդ հոդվածի 3-րդ կետի համաձայն՝ ... մինչև ժամկետի վերջին օրվա ժամը 24:00-ն կապի կազմակերպությանը հանձնված փաստաթղթերը համարվում են ժամկետում հանձնված»:

Ինչպես արդեն հայտնել ենք, Արման Սվազյան Ա/Ձ-ն մասնակցության հայտ է ներկայացրել «Մոնթե Մելքոնյան անվան ռազմամարզական վարժարան հիմնադրամ»-ի կարիքների համար հայտարարված «ՄՄԱՌՎ-ԲՄԾՁԲ-21/1» ծածկագրով բաց մրցույթին և ճանաչվել է ընտրված մասնակից, իսկ նույն արձանագրությամբ որոշել՝ անգործության ժամկետի ավարտից հետո ընտրված մասնակցին պայմանագիր կնքելու առաջարկ ներկայացնել:

Արման Սվազյան Ա/Ձ-ին պայմանագիր կնքելու մասին ծանուցումը և պայմանագրի նախագիծը ուղարկվել է 17.12.2020թ., համապատասխանաբար վերջնաժամկետ է սահմանվել 08.01.2021թ.:

Սակայն՝ Ընթացակարգի գնահատող հանձնաժողովի կողմից՝ ՀՀ ֆինանսների նախարարությանը ուղղված գրություն համաձայն՝ Արման Սվազյան Ա/Ձ-ի հայտը մերժվել է, քանի որ վերջինս հրաժարվել է պայմանագիր կնքելուց /ըստ ՀՀ ֆինանսների նախարարությանը ուղղված գրության/:

Եվ այսպես, գնումների հետ կապված բողոքներ քննող անձի ուշադրությունն ենք դարձնում հետևյալ կարևորագույն հանգամանքի վրա, այն է.

Այսպիսով, Արման Սվազյան Ա/Ձ-ն, խստիվ պահպանելով Օրենքի 36-րդ հոդվածի 3-րդ մասի պահանջները, պայմանագիր կնքելու մասին ծանուցումը և պայմանագրի նախագիծը սրանալուց հետո 10 աշխատանքային օրվա ընթացքում (մինչև 08.01.2021թ. ներառյալ), այն է նույն՝ 08.01.2021թ.՝ փոստային առաքման միջոցով, ստորագրած պայմանագիրը օրենքով սահմանված կարգով ներկայացրել է պատվիրատուին /համապատասխան ապացույցը կցվում է/, սակայն գնահատող հանձնաժողովը արձանագրել է, որ Արման Սվազյան Ա/Ձ-ն հրաժարվել է պայմանագիր կնքելուց, այն հիմքով, որ Արման Սվազյան Ա/Ձ-ն սահմանված ժամկետում կնքված պայմանագիրը չի ներկայացրել:

Հարկանշական է այն փաստը, որ 08.01.2021թ. «ՀԱՅՓՈՍ» ՓԲԸ-ի միջոցով Պատվիրատուին է ուղարկել կնքված պայմանագիրը՝ ինչն էլ ապացուցում է այն հանգամանքը, որ Արման Սվազյան Ա/Ձ-ն չի հրաժարվել պայմանագիր կնքելուց, ավելին, օրենքով թույլատրելի եղանակով Ընկերությունը ստորագրված պայմանագիրը ներկայացրել է պատվիրատուին, սակայն պատվիրատուն անտեսելով վերոհիշյալը՝ որոշել է զրկել Արման

Սվազյան Ա/Ձ-ին գնումների մասին ՀՀ օրենսդրությամբ երաշխավորված պայմանագիր կնքելու իրավունքից

Մինչդեռ «Նորմատիվ իրավական ակտերի մասին» ՀՀ օրենքի 32-րդ հոդվածի 3-րդ կետի համաձայն՝ ... մինչև ժամկետի վերջին օրվա ժամը 24:00-ն կապի կազմակերպությանը հանձնված փաստաթղթերը համարվում են ժամկետում հանձնված?: Իսկ ինչպես արդեն նշել ենք, «Գնումների մասին» ՀՀ օրենքի 36-րդ հոդվածի 3-րդ կետը սահմանում է, որ ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, պետք է ստորագրի և պարզաբանի ներկայացնի այդ պայմանագիրը, ինչը տվյալ դեպքում կատարել է:

Գտնում ենք, որ նման փաստական հանգամանքներում Արման Սվազյան Ա/Ձ-ին չի կարող վերագրվել պայմանագրից կնքելու հրաժարում, քանի որ, ինչպես արդեն նշվել է, 08.01.2021թ. «ՀԱՅՓՈՍ» ՓԲԸ-ի միջոցով Պատվիրատուին է ուղարկել կնքված պայմանագիրը:»:

4. ՍՑ-ԼՕ-2021/22 ընթացակարգի քննության համար էական նշանակություն ունեցող փաստերը.

Սույն գործի քննության համար էական նշանակություն ունեցող փաստերի համաձայն՝

i. «Մոնթե Մելքոնյանի անվան ռազմամարզական վարժարան» հիմնադրամի (այսուհետ նաև՝ Պատվիրատու) կողմից սննդի պատրաստման ծառայությունների ձեռքբերման նպատակով 06.11.2020թ.-ին հայտարարվել է «ՄՄԱՌՎ-ԲՄԾՁԲ-21/1» ծածկագրով բաց մրցույթ (այսուհետ նաև՝ Մրցույթ կամ Ընթացակարգ):

ii. Մրցույթին մասնակցելու նպատակով հայտ է ներկայացրել նաև «Արման Սվազյան» Ա/Ձ-ն:

iii. «Արման Սվազյան» Ա/Ձ-ն մասնակցության հայտի թիվ 1 հավելվածով՝ բաց մրցույթի գնմանը մասնակցելու դիմում-հայտարարությամբ, հայտարարել և հավաստել է, որ բավարարում է «ՄՄԱՌՎ-ԲՄԾՁԲ-21/1» ծածկագրով գնման ընթացակարգի հրավերով սահմանված մասնակցության իրավունքի պահանջներին և պարտավորվում է ընտրված մասնակից ճանաչվելու դեպքում հրավերով սահմանված կարգով և ժամկետում, ներկայացնել որակավորման ապահովում:

iv. Ընթացակարգի գնահատող հանձնաժողովի (այսուհետ նաև՝ Հանձնաժողով) 08.12.2020թ.-ին կայացված նիստի թիվ 4 արձանագրության համաձայն՝ Հանձնաժողովը որոշել է ընտրված /հաղթող/ մասնակից ճանաչել «Արման Սվազյան» Ա/Ձ-ին:

v. 11.12.2020թ.-ին պայմանագիր կնքելու նպատակով գնումների պաշտոնական տեղեկագրում՝ www.gnumner.am կայքում, Հանձնաժողովի կողմից հրապարակվել է պայմանագիր կնքելու որոշման մասին հայտարարություն և անգործության ժամկետ է սահմանվել 5 օրացույցային օր:

vi. Պատվիրատուն 17.12.2020թ.-ին գրությամբ Մասնակցին ներկայացրել է «ՄՄԱՌՎ-ԲՄԾՁԲ-21/1» ծածկագրով պայմանագրի նախագիծը և պայմանագիր կնքելու առաջարկը:

vii. Սույն գործում առկա՝ Մասնակցի կողմից տրամադրված փոստային կտրոնի /առաքանի՝ թիվ 5, կոդը՝ RR290903775/ համաձայն՝ «Արման Սվազյան» Ա/Ձ-ն 08.01.2021թ.-ին պատվիրված նամակով «ՄՄԱՌՎ-ԲՄԾՁԲ-21/1» ծածկագրով բաց մրցույթի գնահատող հանձնաժողովին ուղարկել է առաքանի:

viii. www.haypost.am կայքի ուսումնասիրության արդյունքում պարզվել է, որ փոստային կտրոնի /առաքանի՝ թիվ 5, կոդը՝ RR290903775/ համաձայն՝ առաքանին հանձնվել է հասցեատիրոջը՝ 12.01.2021թ.-ին:

ix. Հանձնաժողովի 11.01.2020թ.-ի նիստի թիվ 5 արձանագրության համաձայն՝ Մասնակցի կողմից, մինչև 08.01.2021թ.-ը, սահմանված ժամկետում չի ներկայացվել հաստատված պայմանագիրը, ուստի որոշում է կայացվել «Արման Սվազյան» Ա/Ձ-ի հայտը մերժել՝ հիմք ընդունելով հրավերի 8.20 կետը:

x. Պատվիրատուն 12.02.2021թ.-ին ներկայացված թիվ 659/1 գրությամբ հաստատել է, որ 12.01.2021թ.-ին ստացել է «Արման Սվազյան» Ա/Ձ-ի կողմից ուղարկված ստորագրված և կնքված պայմանագրի բնօրինակը: Միաժամանակ հայտնել է, որ ծրարում բացակայել են՝

1. «ՄՄԱՌՎ-ԲՄԾՁԲ-21/1» ծածկագրով պայմանագրի նախագծի ընդհանուր գումարի 10%-ի չափով տուժանքի ձևով պայմանագրի կատարման ապահովումը,

2. «ՄՄԱՌՎ-ԲՄԾՁԲ-21/1» ծածկագրով պայմանագրի նախագծի ընդհանուր գումարի 100%-ի չափով տուժանքի ձևով որակավորման ապահովումը,

3. Հաստատված պայմանագրի նախագծի ներկայացման գրությունը:

5. Բողոքներ քննող անձի հիմնավորումները և եզրահանգումը.

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակացության, որ ՀՀ ֆինանսների նախարարության կողմից 27.01.2021թ.-ի թիվ 26/26/1042-2021 գրությամբ «Արման Սվազյան» Ա/Ձ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգն ենթակա է մերժման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 6-րդ կետի «բ» ենթակետի համաձայն՝ ... մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե որպես ընտրված մասնակից հրաժարվել է պայմանագիր կնքելուց:

Նույն հոդվածի 2-րդ մասի համաձայն՝ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում: Տվյալ մասնակցի կարծիքը լսելուց հետո գնումների հետ կապված բողոքներ քննող անձը նույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին նույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Օրենքի 35-րդ հոդվածի 1-ին մասի համաձայն՝ պայմանագրի ապահովում ներկայացնելու պահանջի հիման վրա այն ստանալու օրվանից 10 աշխատանքային օրվա ընթացքում ընտրված մասնակիցը պարտավոր է ներկայացնել պայմանագրի ապահովում: Ընտրված մասնակցի հետ պայմանագիր կնքվում է, եթե վերջինս ներկայացնում է պայմանագրի ապահովում:

Օրենքի 36-րդ հոդվածի 3-րդ մասի համաձայն՝ եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին ներկայացնում պայմանագրի ապահովումը, ապա նա զրկվում է պայմանագիրն ստորագրելու իրավունքից:

ՀՀ կառավարության 04.05.2017թ. թիվ 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 32-րդ կետի 12-րդ ենթակետի համաձայն՝ ընտրված մասնակցին պայմանագիր կնքելու առաջարկը և կնքվելիք

պայմանագրի նախագիծը հանձնաժողովի քարտուղարը տրամադրում է էլեկտրոնային եղանակով: Ապրանքների գնման դեպքում պայմանագրի նախագծում ներառվում է ընտրված մասնակցի կողմից հայտով ներկայացված ապրանքի ամբողջական նկարագիրը:

Նույն կետի 13-րդ ենթակետի համաձայն՝ ընտրված մասնակցի կողմից հաստատված պայմանագրի նախագիծը պատվիրատուին ներկայացվում է գրավոր, և դա ներկայացնելու գրությունը հաշվառվում է պատվիրատուի փաստաթղթաշրջանառության համակարգում: Պատվիրատուի ղեկավարի կողմից պայմանագրի նախագիծը հաստատվում է այդ իրավասության առաջացմանը հաջորդող երկու աշխատանքային օրվա ընթացքում:

Կարգի 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Վերոնշյալ իրավակարգավորումների համադրված վերլուծության արդյունքում, Բողոքներ քննող անձը եզրահանգում է, որ ընտրված մասնակիցը, հանձնաժողովի քարտուղարի կողմից էլեկտրոնային եղանակով ստանալով պայմանագիր կնքելու մասին ծանուցումը և պայմանագրի նախագիծը, պարտավոր է 10 աշխատանքային օրվա ընթացքում պատվիրատուին ներկայացնել իր կողմից հաստատված պայմանագրի նախագիծն ու պայմանագրի կատարման ապահովումը:

Ընդ որում, եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին չի ներկայացնում պայմանագրի ապահովումը, ապա նա զրկվում է պայմանագիրը ստորագրելու իրավունքից:

Նման դեպքում առաջանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «բ» ենթակետի դրույթների կիրառման անխուսափելիությունը, քանի որ վերջինիս գործողությունները (անգործությունը) գնահատվում են, որպես պայմանագիր կնքելուց ընտրված մասնակցի կողմից հրաժարում:

Վերը շարադրվածից ելնելով՝ մասնակիցը պետք է ընդգրկվի գնումների գործընթացին մասնակցելու իրավունք չունեցող մասնակիցների ցուցակում՝ երկու տարի

ժամկետով, քանի որ իր գործողություններով (անգործությամբ) պատվիրատուին չներկայացնելով պայմանագրի օրինակը և/կամ ապահովումը զրկվում է պայմանագիր կնքելու իրավունքից:

«Նորմատիվ իրավական ակտերի մասին» ՀՀ օրենքի 32-րդ հոդվածի 3-րդ մասի համաձայն՝ մինչև ժամկետի վերջին օրվա ժամը 24:00-ն կապի կազմակերպությանը հանձնված փաստաթղթերը համարվում են ժամկետում հանձնված:

Սույն գործի փաստերի համաձայն՝ «Մոնթե Մելքոնյանի անվան ռազմամարզական վարժարան» հիմնադրամի կողմից սննդի պատրաստման ծառայությունների ձեռքբերման նպատակով 06.11.2020թ.-ին հայտարարված «ՄՄԱՌՎ-ԲՄԾՁԲ-21/1» ծածկագրով բաց մրցույթին մասնակցելու նպատակով հայտ ներկայացրած «Արման Սվազյան» Ա/Ձ-ն Հանձնաժողովի 08.12.2020թ.-ին կայացված նիստի թիվ 4 արձանագրության համաձայն՝ ճանաչվել է ընտրված /հաղթող/ մասնակից, ինչով պայմանավորված 11.12.2020թ.-ին պայմանագիր կնքելու նպատակով գնումների պաշտոնական տեղեկագրում՝ www.gnumner.am կայքում, Հանձնաժողովի կողմից հրապարակվել է պայմանագիր կնքելու որոշման մասին հայտարարություն և անգործության ժամկետ է սահմանվել 5 օրացույցային օր, ինչից հետո Պատվիրատուն 17.12.2020թ.-ին գրությամբ Մասնակցին ներկայացրել է «ՄՄԱՌՎ-ԲՄԾՁԲ-21/1» ծածկագրով պայմանագրի նախագիծը և պայմանագիր կնքելու առաջարկը: Հանձնաժողովի 11.01.2020թ.-ի նիստի թիվ 5 արձանագրության համաձայն՝ Մասնակիցը կողմից, մինչև 08.01.2021թ.-ը, սահմանված ժամկետում չի ներկայացվել հաստատված պայմանագիրը, ուստի որոշում է կայացվել «Արման Սվազյան» Ա/Ձ-ի հայտը մերժել՝ հիմք ընդունելով հրավերի 8.20 կետը:

Սույն գործում առկա՝ Մասնակցի կողմից տրամադրված փոստային կտրոնի /առաքանի՝ թիվ 5, կոդը՝ RR290903775/ համաձայն՝ «Արման Սվազյան» Ա/Ձ-ն 08.01.2021թ.-ին պատվիրված նամակով «ՄՄԱՌՎ-ԲՄԾՁԲ-21/1» ծածկագրով բաց մրցույթի գնահատող հանձնաժողովին ուղարկել է առաքանի: www.haypost.am կայքի ուսունասիրության արդյունքում պարզվել է, որ փոստային կտրոնի /առաքանի՝ թիվ 5, կոդը՝ RR290903775/ համաձայն՝ առաքանին հանձնվել է հասցեատիրոջը՝ 12.01.2021թ.-ին:

Պատվիրատուն 12.02.2021թ.-ին ներկայացված թիվ 659/1 գրությամբ հաստատել է, որ 12.01.2021թ.-ին ստացել է «Արման Սվազյան» Ա/Ձ-ի կողմից ուղարկված ստորագրված և կնքված պայմանագրի բնօրինակը: Միաժամանակ հայտնել է, որ ծրարում բացակայել են՝

1. «ՄՄԱՌՎ-ԲՄԾՁԲ-21/1» ծածկագրով պայմանագրի նախագծի ընդհանուր գումարի 10%-ի չափով տուժանքի ձևով պայմանագրի կատարման ապահովումը,

2. «ՄՄԱՌՎ-ԲՄԾՁԲ-21/1» ծածկագրով պայմանագրի նախագծի ընդհանուր գումարի 100%-ի չափով տուժանքի ձևով որակավորման ապահովումը,

3. Հաստատված պայմանագրի նախագծի ներկայացման գրությունը:

Վերոգրյալ իրավանորմերի համալիր վերլուծությունը՝ գործով հաստատված փաստերի գնահատմամբ, թույլ է տալիս գալ այն եզրահանգման, որ «Արման Սվազյան» Ա/Ձ-ն, հանձնաժողովի քարտուղարի կողմից՝ 17.12.2020թ.-ին, էլեկտրոնային եղանակով ստանալով պայմանագիր կնքելու մասին ծանուցումը և պայմանագրի նախագիծը, որպես ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում՝ 08.01.2021թ.-ին, կապի կազմակերպությանն է հանձնել պահանջված փաստաթղթերը, որը «Նորմատիվ իրավական ակտերի մասին» ՀՀ օրենքի 32-րդ հոդվածի 3-րդ մասի իմաստով համարվում է ժամկետում հանձնված:

Ընդ որում, հարկ է նկատել, որ «Մոնթե Մելքոնյանի անվան ռազմամարզական վարժարան» հիմնադրամը Կարգի 45-րդ կետի հիմքով ՀՀ ֆինանսների նախարարությանն է դիմել 18.01.2021թ. թիվ 645/1 գրությամբ, այն դեպքում, երբ 12.02.2021թ.-ին ներկայացված թիվ 659/1 գրությամբ Պատվիրատուն հավաստել է, որ ընթացակարգի գնահատող հանձնաժողովի քարտուղարը փոստի միջոցով 12.01.2021թ.-ին ստացել է «Արման Սվազյան» Ա/Ձ-ի կողմից ուղարկված իր կողմից ստորագրված և կնքված պայմանագրի բնօրինակ:

Ամբողջացնելով վերոգրյալները՝ Բողոքներ քննող անձը փաստում է, որ Պատվիրատուն կարող էր Կարգի 45-րդ կետով սահմանված ու իր վրա դրված պարտավորությունը կատարել «Նորմատիվ իրավական ակտերի մասին» ՀՀ օրենքի 32-րդ հոդվածի 3-րդ մասի դրույթների հաշվառմամբ, որի արդյունքում 12.01.2021թ.-ին ստանալով «Արման Սվազյան» Ա/Ձ-ի կողմից ուղարկված իր կողմից ստորագրված և կնքված պայմանագրի բնօրինակը կհամարվեր ժամկետում ներկայացված, ուստի և պայմանագիրը կնքված:

Ինչ վերաբերում է Մասնակցի կողմից «ՄՄԱՌՎ-ԲՄԾՁԲ-21/1» ծածկագրով պայմանագրի նախագծի ընդհանուր գումարի տուժանքի ձևով 10%-ի չափով պայմանագրի կատարման և 100%-ի չափով որակավորման ապահովումները չներկայացնելուն, ապա Բողոքներ քննող անձն արձանագրում է, որ Հանձնաժողովի քարտուղարի կողմից 17.12.2020թ.-ին գրությամբ Մասնակցին ներկայացրել է «ՄՄԱՌՎ-ԲՄԾՁԲ-21/1» ծածկագրով պայմանագրի նախագիծը և պայմանագիր կնքելու առաջարկը, իսկ տուժանքի

ձևով պայմանագրի կատարման և որակավորման ապահովումներ ներկայացնելու պահանջ չի ներկայացվել, ուստի այս պարագայում, Մասնակցի կողմից վերոնշյալ փաստաթղթեր չներկայացնելը չէր կարող հանգեցնել Պատվիրատուի կողմից պայմանագիր կնքելուց հրաժարվելու հանգամանքով պայմանավորված Մասնակցի հայտի մերժմանը:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում՝ Բողոքներ քննող անձը հանգում է այն եզրակացության, որ «Արման Սվազյան» Ա/Ձ-ն, որպես ընտրված մասնակից, Օրենքով սահմանված կարգով և ժամկետներում, պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում՝ 08.01.2021թ.-ին, Պատվիրատուին ներկայացրել է պայմանագիրը, որպիսի պայմաններում Մասնակիցը չի հրաժարվել պայմանագիր կնքելուց:

Վերոնշյալներով պայմանավորված՝ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «բ» ենթակետում նշված պատասխանատվությունը չի կարող վրա հասնել ու հանգեցնել Մասնակցին՝ գնումների գործընթացին մասնակցելու իրավունք չունեցող մասնակիցների ցուցակում ընդգրկելուն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը՝

Ո Ր Ո Շ Ե Ց

ՀՀ ֆինանսների նախարարության կողմից 27.01.2021թ.-ի թիվ 26/26/1042-2021 գրությամբ «Արման Սվազյան» Ա/Ձ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ՍՅ-ԼՕ-2021/22 ծածկագրով ընթացակարգը մերժել:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊՎԱԾ
ԲՈՂՈՔՆԵՐ ՔՆՆՈՂ ԱՆՁ՝**

ԼԵՎՈՆ ՕՇԱՆՅԱՆ

